

Siunnersuummut nassuiaatit

Nassuiaatit nalinginnaasut

1. Aallaqqaasiut

Suliffissanut, ilitersuisarnernut pikkorissaqqinnernullu qitiusumik ingerlatsiviit suliffissanut, ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni nr. 28, 9. december 2015-imeersumi maleruagassiivigineqarput.

Inatsisartut inatsisaanni, suliffissanut, ilitersuisarnernut pikkorissaqqinnernullu qitiusumik ingerlatsivinni ilinniartunut, ilinniartunut tapersiissutit pillugit maleruagassat Inatsisartut inatsisaanni ataatsimi ataatsimoortinneqarput. Inatsisartut inatsisaat ilinniartunut tapersiissutit pillugit tunngaviusunik aalajangersakkanik piginnaatitsissutinullu aalajangersakkanik imaqarpoq, nalunaarutini inatsisini sukumiinerusumik maleruagassiilluni aalajangersaanermut atorneqarsinnaalluni. Naalakkersuisut taamaalillutik ilinniartunut tapersiissutinik tiguisinissamut piumasaqaatit pillugit, ilinniartut atuariartortarnerinik nalunaarsuinissamut piumasaqaatit ilaalu ilanngullugit, pillugit maleruagassanik erseqqinnerusunik aalajangersaanissamut, piginnaatinneqarput.

Siunnersuut suliffissaaleqisut ikilisinniarlugit Naalakkersuisut periaasissaanni ilaavoq. Siunnerfigineqarput suliffissaaleqisut aamma inuusuttut suli suliffeqalersimangitsut. Taakkua qanoq iluatsilluartumik ingerlaqqissinnaanerlutik aammalu siunissami suliffeqalersinnaanerlutik imaluunniit suliffeqaleqqissinnaanerlutik suliffissanut, ilitersuisarnernut pikkorissaqqinnernullu qitiusumik ingerlatsivinni pilersaaruserisassat aammalu nunatsinni suliffissarsinissamik ikiorneqassallutik.

2. Siunnersuummi immikkoortut pingarnerit

Inatsisartut inatsisaanni ilinniarnermi tapiissutit pillugit maleruagassat tunngaviusussat aalajangersarneqarput, ilanngullugit ilinniartunut tapersiissutit annertussusissaat aalajangersarneqarlutik aammalu ilinniartunut tapersiissutinik tunniussisarnermut tunngavissarititaasut tunngaviusussat. Kiisalu Inatsisartut inatsisaat, atuariartorsimanerup nalunaarsorneqarnissaa nakkutigineqarnissaalu aammalu ilinniartunut tapersiissutinik tunniussisarneq pillugit aalajangersakkanik, imaqarpoq.

Kapitali 1

Kapitali 1-imi kikkut ilinniartunut tapersiissutinik tiguisinnaanersut aalajangersarneqarpoq. Ukiumut ilinniartut amerlassuserisassaasa aalajangersarnissaat maleruagassaqarpoq. Ukiumut

ilinniartut amerlassuserisassaakommunit akornanni agguarneqartussat Naalakkersuisut aamma kommunit akornanni angusassanut isumaqatigiissutini aalajangersarneqartassapput. Inatsisartut inatsisaat aammalu maleruagassat Naalakkersuisunit aalajangersagaasut ilaalu ilanngullugit isiginiarlugit, kommunalbestyrelsi allaffissornikkut aqutsisuussasoq aammalu ilinniartunut tapersiissutinik tunniussisartuussasoq, kapitalimi aalajangersarneqarput.

Kapitali 2

Kapitali 2-imi ilinniartunut tapersiissutit suusinnaanersut (ilinniarnermut tapiissutit, meeqqanut tapit aamma akiliunneqarluni angalaneq) aalajangersarneqarpoq aammalu ilinniartunut tapersiissutit pillugit maleruagassanik erseqqinnerusunik aalajangersaanissamut Naalakkersuisut atituumik piginnaatinneqarput, ilanngullugit ilinniartunut tapersiissutinik tigusinissamut piumasaqaatinik sukumiinerusunik aalajangersaanissaq aammalu tapit ilaalu ilanngullugit annertussusissaannik aalajangersaanissaq.

Ilinniarnermut tapiissutinut akigititat siunissami maannakkut pisartutut aningaasanut inatsimmi pinnani, Inatsisartut inatsisaanni aalajangersarneqartassapput. Ilinniarnermut tapiissutit annertussusaat ukiumoortumik procentimik aaqqiissutissamik iluarsineqartassapput procenti aaqqiissutissaq aamma maannakkut isertitat pillugit inatsisartut inatsisaat naapertorlugu.

Kapitali 3

Kapitali 3 ilinniartunut tapersiissutinik tigusinissamut piumasaqaatinik tunngaviusussanik, inatsimmi aalajangersarneqarnissaat tulluarnertinneqartunik, imaqarpoq. Ilinniartut atuangiffeqartut, ilaallutik erninerup/qitornartaarnerup kingorna atuangiffeqartut, tapersiissuteqaqqusaannginnerannik maleruagassaq assersuutigigaanni Inatsisartut inatsisaannut inississallugu tulluarnertinneqarsimavoq nalunaarummut inissinnagu.

Tamatuma saniatigut ilinniartunut tapersiissutinik tigusinissamut piumasaqaatinik erseqqinnerusunik Naalakkersuisut aalajangersaanissaannut inatsimmi tunngavissamik kapitali imaqarpoq. Piumasaqaatit innuttaasunut tunngatinneqarsimappata, taakkua nalunaarummi aalajangersarneqassasut naatsorsuutigineqarpoq.

Kapitali 4

Kapitali 4 atuartut atuariartortarnerinik nalunaarsuisarneq pillugu aalajangersakkanik imaqarpoq. Nalunaarsuineq akuerisaanngitsumik atuangitsoornermi ilinniartunut tapersiissutit annikillisinneqartarnissaannut tunngavissaliissaaq, taamatullu ilinniartunut tapiissutinut aningaasartuutitut kommunit Naalakkersuisunit utertillugit akilersinnissaannut nalunaarsuineq tunngavissaliissaaq.

Maleruagassani siunertaavoq atuarnermi peqataaneq uppersarnerqarsinnaatillugu taamaallaat atuarnermi peqataasunut tunniussisoqarsinnaaneranut tunngavissaliinissaq.

Kapitali 5

Inatsisartut inatsisaata atuutilernerata ullua *kapitali 5*-imi aalajangersarneqarpoq.

3. Pisortanut aningaasaqarnikkut allaffissornikkullu sunniutaasussat

Siunnersuummi maannamut ilinniartunut tapersiissutitut aqqiissuusaq ingerlateqqinneqarpoq.

Ilinniartunut tapiissut procenti aqqiissutissaq aamma maannakkut isertitat pillugit inatsisartut inatsisaat naapertorlugu ukiumoortumik iluarsineqartassasoq naatsorsuutigineqarpoq. Atuartut amerlassusissaannut amerlassusiliussat ukiumiit ukiumut allanngoranggippata, ukiumoortumik iluarsisarnep taassuma malitsigisaanik, ukiuni kingusinnerusuniittuni aningaasartuutit ukiut siuliinit qaffasinnerussapput.

Atuartut amerlassusissaannut amerlassusiliussat taamaalillunilu aningaasat suliffissanut, ilitsersuisarnernut pikkorissaqqinnernullu qitiusumik ingerlatsivinni ilinniartunut tapersiissutitut immikkoortinneqartut tamarmiusut, maannamut pisartutut ukiumoortumik aningaasanut inatsisini aalajangersarneqartassapput. Maannamut pisartutut ilinniartunut tapersiissutitut aningaasartuutitut tamarmiusunut, taamaalilluni ukiumoortumik inatsisartut inatsisaanni pingaarnersuinerit apequtaassapput.

Siunnersuummi suliffissanut, ilitsersuisarnernut pikkorissaqqinnernullu qitiusumik ingerlatsivinni ilinniartunut tapersiissutitut pillugit Inatsisartut inatsisaannik ataatsimoortumik pilersitsisoqarpoq.

Inatsisartut inatsisaat, ilinniartut atuariatortarnerannik nalunaarsuisarnissaq pillugu suliffissanut, ilitsersuisarnernut pikkorissaqqinnernullu qitiusumik ingerlatsivinnut piumasaqaatinik ersarinnerusunik, aammalu kommunalbestyrelsi nalunaarsuinerit tunngavigalugit, ilinniartut akuerisaanngitsumik atuanngitsoorneranni ilinniartunut tapiissutini annikillisisarnissaanik imaqqarpoq. Kiisalu ilinniartunut tapersiissutitut tunniunneqarsimasunik utertitsilluni akiliisitsinissamut atatillugu kommunalbestyrelsi ilinniartut atuartarnerat pillugu paasissutissanik Naalakkersuisunut nalunaarutiginnittarnissaa pillugu piumasaqaatinik Inatsisartut inatsisaat imaqqarpoq.

Paasissutissat qanoq nalunaarutigineqartassanersut, ilanngullugit suleriaatsit aammalu paasissutissat suut nalunaarutigineqartassanersut, Naalakkersuisut kommuninut aamma suliffissanut, ilitsersuisarnernut pikkorissaqqinnernullu qitiusumik ingerlatsivinnut ilitsersuummik saqqummiipput.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuut inuussutissarsiortunut sunniuteqassanngilaq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut imaluunniit inuit peqqissusaannut sunniuteqassasoq naatsorsuutigineqanngilaq.

6. Innuttaasunut sunniutaasussat

Innuttaasut pisinnaatitaaffiinit aammalu pisussaaffiinit tunngatillugu maannamut ilinniartunut tapersiissutinut aaqqissuussineq siunnersuummi ingerlateqqinneqarpoq.

Maannamut ilinniartunut tapersiissutit pillugit maleruagassat ilinniagaqarnersiutit pillugit Inatsisartut inatsisaanni aamma Namminersorlutik Oqartussat ilinniagaqarnersiutit pillugit nalunaarutaanni kiisalu allaffissornikkut suleriaatsimi sumiiffinni assigiinngitsuniissimallutik, siunnersuummi matumani maleruagassani ataatsini aalajangersakkat ataatsimoortinneqarput.

7. Sunniutaasussat annertuut allat

Inatsisartut inatsisaat annertuunik allanik sunniuteqassanngilaq.

8. Oqartussaasut kattuffiillu il.il. tusarniaaffigineqarnerat

Siunnersuut piffissami 2017-imi 9. maajimiit 2017-imi 13. juunimut Naalakkersuisut tusarniaanermut nittartagaanni tamanut saqqumitinneqarpoq. Tamatuma saniatigut siunnersuut makkununnga tusarniaassutigalugu nassiunneqarpoq:

Naalakkersuisoqarfinnut tamaginnut, Qeqqata Kommunia, Kommune Kujalleq, Kommuneqarfik Sermersooq, Qaasuitsup Kommunia, KANUKOKA, Sulisitsisut, NUSUKA, SIK, IMAK, ASG aamma AK.

Makkununnga tusarniaanermut akissuteqaat tiguneqarpoq: Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfik, Aningaasaqarnermut Akileraartarnermullu Naalakkersuisoqarfik, Aatsitassanut Ikummatissanullu Naalakkersuisoqarfik, Aalisarnermut Piniarnermullu Naalakkersuisoqarfik, Peqqissutsimut Naalakkersuisoqarfik, Kommune Kujalleq, Qaasuitsup Kommunia, Qeqqata Kommunia, KANUKOKA, SIK, IMAK aamma Sulisitsisut.

Matuma kinguliani tusarniaanermut akissuteqaatit pingaarnerpaartaat allaaserineqarput.

Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalackersuisoqarfik, Aningaasaqarnermut Akileraartarnermullu Naalackersuisoqarfik, Aatsitassanut Ikummatissanullu Naalackersuisoqarfik, Aalisarnermut Piniarnermullu Naalackersuisoqarfik, Peqqissutsimut Naalackersuisoqarfik aamma Qaasuitsup Kommunia siunnersuummut oqaaseqaatissaqarsimangillat.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup aallarniutigalugu oqaatigaa, pikkorissaqqilluni atuarnermut ilinniartunut tapersiissutit inatsimmi immikkoortumi maleruagassiivigineqarnissaat siunnersuutigineqarnera naleqquttuutinneqartoq, taamatullu Naalackersuisoqarfiup siunnersuut taperseraa.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup § 2-imut oqaatigaa: "Aalajangersakkami siunnerfigineqartut erseqqissarlugit ilassusiinissaq isumaliutersuutigineqarsinnaagaluarpoq."

Siunnerfigineqartut tassaapput suliffissanut, ilitersuisarnermut pikkorissaqqinnernullu qitiusumik ingerlatsivinni pikkorissaqqillutik ilinniartut. Siunnersuummi § 3-imi suliffissanut, ilitersuisarnermut pikkorissaqqinnernullu qitiusumik ingerlatsivinni pikkorissaqqinnerit suut ilinniartunut tapersiissuteqarnissamut piginnaatitsisuusut, erseqqissarneqarpoq. Siunnersuummi siunnerfigineqartut taamaalillutik siunnersuummi § 3-imi nassuiarneqarput. Tamatuma saniatigut siunnersuummi nassuiaatini nalinginnaasut, immikkoortoq 1-imi, siunnerfigineqartut pillugit immikkoortoq ilanngunneqarpoq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqiluni § 3, nr. 2, uniffimmut kingullermut oqaatigaa: "Aningaasartat (annertussusaat) qanoq amerlatigisut ilinniartunit ilinniarnerninnut atatillugu akeqanngitsumik nerisaqartunit ineqartunillu ilanngaatigineqartassanersoq, allassimangilaq. Tassami "ilinniartitaaneq" pineqarunangilaq, kisianni pikkorissaaqqinneq pineqarluni, takuuk siunnersuummi § 2."

§ 3 (maannakkut § 7) oqaaseqaammut naapertuuttumik allanngortinneqarpoq, taamaalilluni "ilinniartitaanermut" taarsiullugu "pikkorissaaqqinneq" atorineqarluni.

Aningaasartanut nerisaqarnermut ineqarnermullu ilanngaatigineqarsinnaasunut tunngatillugu oqaasertaliineq maannamut suleriaasiusumut naapertuuttoq tassani pineqarpoq. Ilinniartut 18-inik ukioqalereersimasut akeqanngitsumik nerisaqarpata ineqarpatalu "taakkununnga aningaasanik" ilanngaatsittassasut 2017-imut aningaasanut inatsimmi kontumut pingaarnermut 40.02.06 Ilinniarnermi tapiissutit meeqqanullu tapit pillugit oqaasertaliussami periarfissiisoqarpoq.

Oqaasertaliineq naleqqutsinneqarpoq pissutigalugu aningaasat qanoq annertutigisut nerisaqarnermut ineqarnermullu ilanngaatigineqartarnissaannut tunngatillugu eqaannerutitsisussaammat. Oqaasertaliinermi ilinniartut ataasiakkaat inissisimanerisa sillimaffigineqarnissaat periarfissinneqarpoq, assersuutigalugu ilinniartup pisuni ataasiakkaani ineqarnikkut inissisimaneera aammalu ilinniartup nerisaqarnermut aningaasartuutai sillimaffigineqassallutik.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni §§ 9-imut aamma 10-imut oqaatigaa:” § 9 atuagarsornermut tunngassuteqarpoq, § 10 atuagarsorani atuarnermut tunngassuteqarluni. Tassunga atatillugu allassimannigilaq § 2, nr. 5-imi”pikkorissaaqqinneq allatut iluseqartoq” taaneqartoq aalajangersakkamut sorlermut tunngassuteqarnersoq, ilanngullugu § 9 imaluunniit § 10 malillugit taakkununnga ilinniartunut tapersiisoqarsinnaanersoq.”

”Pikkorissaaqqinneq allatut iluseqartoq” § 3, nr. 5-imi taaneqartoq, atuagarsornermut aamma atuagarsunnginnermut tunngassuteqarsinnaavoq. Pikkorissaaqqinneq atuagarsoreruppat, taanna siunnersuummi § 10-mi pineqartunut ilaassaaq aammalu pikkorissaaqqinneq atuagarsorerunngitsoq siunnersuummi § 11-mi pineqartunut ilaassalluni.

”Pikkorissaaqqinneq allatut iluseqartoq” Namminersorlutik Oqartussat aamma kommunit suliffissanut, ilitsersuisarnernut pikkorissaaqqinnernullu qitiusumik ingerlatsiviit ingerlanneqarnerat pillugu angusassanut isumaqatigiissutaanni erseqqinnerusumik nassuiarneqarpoq, takuuk suliffissanut, ilitsersuisarnernut pikkorissaaqqinnernullu qitiusumik ingerlatsiviit pillugit Inatsisartut inatsisaat, § 9, imm. 1.

Allatut iluseqartumut pikkorissaaqqinnermut assersuutit tassaapput tunisassiornermut atuarfimmi atuarneq, Danmarkimi oqaatsinik pikkorissarneq, tammaarsimaarluni sulineq aamma pinngortitami pisunnerit.

§ 3-imut aalajangersakkanut ataasiakkaanut nassuiaatit tusarniaanermut akissuteqaat tunngavigalugu itisilerneqarput.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni § 13-imut oqaatigaa:” § 13 malillugu atuariartunngitsoornermut imaluunniit inortuinermit tunngatillugu annikinnerpaaffissanut killissamik ilanngussinissaq, imaluunniit tamanna pillugu maleruagassamik aalajangersaanissamut inatsimmi tunngavissamik ilanngussinissaq, isumaliutersuutigineqarsinnaavoq.”

Tusarniaaffigineqartup siunnersuutigisaatut § 13, imm. 3 (maannakkut § 14, imm. 3) nutaaq ilanngunneqarpoq, taanna malillugu Naalakkersuisut annikinnerpaaffissanut killissaq taamaattoq pillugu maleruagassanik aalajangersaasinnaallutik (kisianni pinngitsooratik taamaaliortussaananatik). Aallaaviuvoq akuerisaanngitsumik takkutinnngitsoornerit tamarmik ilinniartunut tapersiissutini annikillilerinermik malitseqqassasut.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup ingerlaqqilluni oqaatigaa: ” Ilusaanut tunngatillugu ilinniarnermut tapiissutinut annertussusissaliussat pillugit ilinniarnermut tapiissutinut annertussusissaliussat pillugit § 3-imi aamma annertussusissaliussat iluarsineqartarnerat pillugu § 4-imi aalajangersagaq, aalajangersakkat aallarniutaasut pillugit kapitali 1-imi pinnani, pillugu taperseeriaatsit pillugit kapitel 2-imut annertussusiliussanik iluarsisarnermut tunngasuni ikkunnissaa, isumaliutersuutigineqarsinnaagaluarpoq. ”

Inatsisartut inatsisaata aaqqissuunera, tusarniaanermut akissuteqaammut naapertuuttumik allanngortinneqarpoq. Aalajangersakkat marluk uku: Ilinniarnermut tapiissutinut annertussusissaliussat aamma annertussusissaliussat iluarsineqartarneri pillugit Inatsisartut inatsisaanni kapitali 2-imut nuunneqarput.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup ingerlaqqilluni oqaatigaa: ” Ilinniartunut tapersiissutit siunertaata pingaarnepup kiisalu ilinniartunut tapersiissutinut tunngaviusup allanneqarnera ujartorneqarpoq, ilanngullugu ilinniartut Majoriaq-mi pikkorissaqqinnissamut tiguneqartut aammalu tiguneqarnissamut tunngavissarititaasut allallugit, ilinniartunut tapersiissutinut siunnerfigineqartut. Tamanna assersuutigalugu nassuiaatini nalinginnaasuni pisinnaassaaq. ”

Nassuiaatini nalinginnaasuni immikkoortoq 1 itisilerneqarpoq, ilinniartunut tapersiissutinut tunngaviusoq, siunnerfigineqartut aammalu ilinniartunut tapersiissutinut siunertaasoq nassuiarneqarlutik.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup ingerlaqqilluni oqaatigaa: ” Nassuiaatini nalinginnaasumi immikkoortoq 1-imi aammattaaq allassimavoq, ilinniartunut tapersiissutit maannamut Ilinniagaqarnerisutit pillugit Inatsisartut inatsisaat nr. 12, 22. november 2011-imeersumi aammalu ilinniagaqarnerisutit nalunaarummi inatsit tunngavigalugu aalajangersagaasumi, maleruagassiivigineqartut. Tassunga tunngatillugu oqaatigineqassaaq, siunnersuutip saqqummiunneqarnerata nalaani taamaattoqarsimanaviannngitsoq, tassami ilinniartunut tapersiissutit piffissami tassani tamatumunnga taarsiullugu oqaasertaliussami inatsimmi tunngavissinneqassasut naatsorsuutigineqarmat, taamaalillunilu ilinniagaqarnerisutit maleruagassani pineqartunut ilaasussaananatik. ”

Siunnersuutip tusarniaassutigineqareerneranili aalajangiisoqarpoq, ilinniartunut tapersiissutit ilinniagaqarnersiutit pillugit Namminersorlutik Oqartussat nalunaarutaanni maleruagassiivigineqarnerat, Inatsisartut inatsisaata matuma atuutilernissaata tungaanut, atuutsiinnarneqassasoq. Tamanna tunngavigalugu immikkoortoq 1-imi aallarniutaasoq allanngortinneqarpoq. Piffissami siunnersuutip matuma atuutilernissaata tungaanut taamaalilluni ilinniartunut tapersiissutit ilinniagaqarnersiutit pillugit Inatsisartut inatsisaanni aammalu ilinniartunut tapersiissutit ilinniagaqarnersiutit pillugit Namminersorlutik Oqartussat nalunaarutaanni atuuttumi maleruagassat maannamut atuuttut malillugit maleruagassiivigineqarput.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa: ” Tulliullugu nassuiaatini nalinginnaasuni immikkoortumi aallarniutaasumi allassimavoq, piginnaatitsinermut aalajangersakkat nalunaarutinik ilitsersuutinik ilaalu ilanngullugit maleruagassiinernik sukumiinerusunik aalajangersaanermut atorneqarsinnaasut. Ilitsersuutit inatsisitigut maleruagassiinertut isikkoqartanngillat, taamaattumillu tassunga atatillugu taaneqartariaqanngikkaluarlutik. ”

Nassuiaatini nalinginnaasuni immikkoortumi aallarniutaasumi nassuiaatit iluarsineqarput.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa: ” Siunnersuummi immikkoortut pingaarnerit ataanni immikkoortoq 2-imi immikkoortumi siullermi allassimavoq, ilinniartunut tapersiissutinut annertussusiliussat aalajangersarneqartassasut. Tassunga tunngatillugu oqaatigineqassaaq, siunnersuummi ”ilinniartunut tapersiissutit” taperseeriaatsinut inatsimmi pineqartunut ilaasunut ataatsimoorussamik taaguutaammat, tassalu imaappoq ilinniarnermut tapiissutit, meeqqanut tapeq aamma akiliunneqarluni angalaneq, takuuk § 7, imm. 1. Taamaattumik ”ilinniartunut tapersiissutit” taarserneqartariaqaraluarpoq matuminnga ”ilinniarnermut tapiissutinut annertussusissaliussat”.

Nassuiaatit tusarniaanermut akissuteqaammut naapertuuttumik iluarsineqarput.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa: ” Immikkoortut aappaanni allassimavoq, ilinniartunut tapersiissutinut annertussusiliussat, aningaasanut inatsimmut taarsiullugu Inatsisartut inatsisaanni aalajangersarneqassasut, tamatuma sooq naleqquttutut nalilerneqarneranut tunngaviusoq nassuiarneqarani. ”

Annertussusissaliussat aningaasanut inatsimmiinnissaannut taarsiullugu Inatsisartut inatsisaanni aalajangersarneqarnerat naleqqutsinneqarpoq, tassami tamanna

tunniunneqartartunut tunngatillugu sioqqutsisumik paasisitseretassamat. Aningaasartut sioqqutsisumik paasereersimanissat pingaartumik pingaaruteqarpoq, tassami tunniunneqartartut innuttaasut pineqartut pisinnaatitaaffigaat.

§ 7-imut nassuiaatit tusarniaanermut akissuteqaat tunngavigalugu itisilerneqarput, annertussusissaliussat, assersuutigalugu maannamut pisartutut aningaasanut inatsimmi pinnani, Inatsisartut inatsisaanni aalajangersarneqartarnissat soq toqqarneqarnersoq nassuiarneqarluni.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa: ” Immikkoortoq 3-imi pisortanut aningaasaqarnikkut allaffissornikkullu sunniutaasussanut tunngasumi allassimavoq, siunnersuut imminermini aningaasaqarnikkut sunniuteqassanngitsaq. Siunnersuut ilinniarnermut tapiissutinut annertussusissaliussat akinik iluarsinermut naleqqersuut naapertorlugu iluarsineqartassasoq pillugu aalajangersakkamik imaqarpoq, tamannalu maannamut taamatut pisarsimannngilaq. Iluarsiisarneq taaneqartoq taamaattumik, qanoq pisoqaraluarpullunniit, aningaasaqarnikkut sunniuteqartussaavoq. ”

Siunnersuutip tusarniaassutigineqareernerata kingorna akinik iluarsinissamut naleqqersuut naapertorlugu iluarsinissaq pillugu aalajangersagaq peerneqarpoq. Tamatumunnga pissutaavoq ilinniarnermut tapiissutinut annertussusissaliussat Inatsisartut inatsisaanni aalajangersarneqartut, tamatumunnga taarsiullugu procenti aaqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit ukiumoortumik iluarsineqartussaanerit, takuuk § 8.

Pisortanut aningaasaqarnikkut allaffissornikkullu sunniutaasussani immikkoortoq 3 allanngortinneqarpoq ukiumoortumik iluarsisarneq taanna allaaserineqartunngorlugu.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa: ” § 1-imut nassuiaatini allassimavoq, ukiumut ilinniartut amerlassusissaat, kommuninut ataasiakkaanut tamaginnut atugassiissutigineqartartut, aningaasanut inatsimmi aalajangersarneqartartut, taamatullu § 5-imut innersuussisoqarluni. Kisianni tamanna § 5-imi allassimannngilaq. ”

§1-imut aamma § 5-imut (maannakkut § 4) aalajangersakkanut ataasiakkaanut nassuiaatit allatut oqaasertalerneqarput, tassami § 1-imut aalajangersakkanut ataasiakkaanut nassuiaatit tusarniaassutigineqartut nalornilersitsimmata.

Ukiumut ilinniartut amerlassusissaat ataatsimut katillugit § 1-imut nassuiaatini taaneqartut aningaasanut inatsimmi aalajangersarneqartarput. § 5-imi (maannakkut § 4), § 1-imut

nassuiaatini innersuussutigineqartumi aalajangersarneqarpoq, kommunini ataasiakkaani tamaginni ukiumut ilinniartut amerlassusissaat angusassanut isumaqatigiissutini Naalakkersuisunit aalajangersarneqartassasut. Tamanna maannamut aaqqissuussinermut assinguvoq.

Angusassanut isumaqatigiissutit aammattaaq suliffissanut, ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni, § 9-imi, maleruagassat malillugit suliarineqartarput.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup ingerlaqqilluni oqaatigaa: ”2-imut nassuiaatini ”angusassanut isumaqatigiissutit” taaneqarpoq. ”Kiffartuunneqarnissamut isumaqatigiissutit” § 5-imi taaneqartut tassani pineqarsimappata, oqaatsit atorneqartut assigiissaarneqartariaqarput.”

§ 3-mut nassuiaatit allangortinneqarput, taamaalilluni oqaatsit atorneqartut assigiiaartut atorneqarlutik. Siunnersuummi maannakkut oqaaseqatigiit angusassanut isumaqatigiissut tamatigut atorneqarpoq.

Suliffissanut, ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni § 9, imm. 1-imi aamma 2-imi angusassanut isumaqatigiissutit saniatigut aamma taamaaqataa kiffartuussinissamut isumaqatigiissut atorneqarpoq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup ingerlaqqilluni oqaatigaa: ”Atuartut amerlassusissaasa agguarneqarnissaat tunngavissarititaasut suut malillugit pissanersoq, § 5-mut nassuiaatinut atatillugu iluaqutaasumik paasisutissiissutigineqarsinnaavoq.”

§ 5-imut (maannakkut § 4) nassuiaatit itisilerneqarput, atuartut amerlassusissaasa kommunit akornanni agguarneqarnerat Naalakkersuisut kommunillu akornanni isumaqatigiinniareernermit angusassanut isumaqatigiissutini aalajangersarneqassasoq nassuiarneqarluni. Agguarneqarnerat suliffeqarnermi suliniutini ataatsimoortuni ilaatillugu pissaaq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup ingerlaqqilluni oqaatigaa: ”§ 7-imut nassuiaatini allassimavoq ilinniartunut tapersiissutit meeqqanut tapiissutit tunniunneqarsinnaasut. Ilimanarpoq tassani meeqqanut tapit pineqartut, tamannalu aamma § 11-imut nassuiaatinut tunngatillugu ersippoq. Aammattaaq ”ilinniarnermut tapiissutit” qanoq paasineqarnerasoq nassuiarneqartariaqaraluarpoq, ilanngullugu ilinniagaqarnersiutinut inatsisip iluani atuuttut assigalugit, aningaasat qaammatikkaartumik inuussutissanut aningaasartuutit imaluunniit

taakkua ilaasa matussusernissaat siunertaralugu tunniunneqartartut pineqarnerisut. Taamaaqataanik "akiliunneqarluni angalanerit", tassani oqaaseq taanna erseqqissarneqartariaqaraluarluni. Tassunga atatillugu erseqqissarneqarsinnaavoq akiliunneqarluni angalanerit suunersut, assersuutigalugu pikkorissaqqinnerup aallartinnissaanut atatillugu ilinniartup aalajangersimasumik najugaqarfianut illoqarfimmut ilinniarfiusussamut akiliunneqarluni angalanertut iluseqartoq, pikkorissaqqinnerup naammassineranut imaluunniit unitsinneqarneranut il.il. atatillugu illoqarfimmit ilinniarfiusumit Kalaallit Nunaanni aalajangersimasumik najugaqarfigisamut kingullermut akiliunneqarluni angalanertut iluseqartoq."

§ 7-imut (maannakkut 6) aamma § 11-mut (maannakkut § 12) nassuiaatit allanngortinneqarput, taamaalilluni oqaatsit atorneqartut assigiissaartut atorneqalerlutik. Inatsisartut inatsisaanni taamaalilluni oqaaseq "meeqqanut tapeq" atorneqarpoq.

Ilinniarnermut tapiissutit qaammatikkaartuupput, inuuniarnermut aningaasartuutit matussusiinissamik siunertaqartut.

Angalanerit suut ilinniartumut ikiorsiissutigineqarsinnaanersut, Inatsisartut inatsisaata atuutilernerata kingorna nalunaarutit iluseqartuni aalajangersarneqassasut naatsorsuutigineqarpoq. Nalunaarummi maleruagassat angalanernut suliffissanut, ilitersuisarnernut pikkorissaqqinnernullu qitiusumik ingerlatsivinni ilinniartunut ikiorsiissutigineqarsinnaasunut tunngatillugu maannamut suleriaatsit ingerlateqqinneqarlutik maleruagassanik aalajangersaanissaq naatsorsuutigineqarpoq. Nalunaarut aamma akiliunneqarluni angalaneq suminngaaniit sumut ikiorsiissutigineqarsinnaanersoq pillugu aalajangersakkanik erseqqinnerusunik imaqaasasq naatsorsuutigineqarpoq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa:" Allassimavoq meeqqanut tapeq ilinniartup meeraanut ataatsimut tunniunneqartassasq. Tamanna nassuiaatini inatsisiliornerusoq ilimagineqartariaqarpoq, taamatullu oqaatsimut "meeraanut" tunngasoq ersarinngitsoq. Ilimagineqartariaqarpoq tamatumani isumaasoq meeqqat ilinniartup pilersuisussaataaffigisai, takuuk meeqqat inatsisitigut inissisimanerat pillugu Kalaallit Nunaannut inatsimmi nr. 197,16. juni 1962-imeersumi § 13, imm. 1."

§ 7-imut (maannakkut § 6) nassuiaatit tusarniaanermut akissuteqaammut naapertuuttumik allanngortinneqarput. Meeqqanut tapeq pillugu maleruagassat Naalackersuisunit maleruagassiivigineqassapput, takuuk siunnersuummi § 6, imm. 2.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa:" Kikkut tamangajammik immikkut

akuersissuteqarnissami pineqartunut ilaalersinnaanerit § 9, imm. 2-imut nassuiaatit suliaqarnermi malitsigissavaat, tamatumani aalajangersagaq piukkunnarsaaqqinnermik ilassuserneqanngippat.”

§ 10-mi ilinniartunut tapersiissutit qanoq sivilutigisumik tigusartagarineqarsinnaanersut pingaarnertut maleruagassaq aalajangersarneqarpoq. § 10, imm. 1-imi maleruagassami pingaarnermi, aaqqissuussinerup eqqarsaatigineqarneratut ungasinnerusoq isigalugu inuit piareersarlugit ilinniartitaanermut imaluunniit suliffeqarnermut ingerlaqqinnissaminnut taarsiullugu, periaatsimi ”nikinnaveernissaat” pinngitsoortinneqassaaq. Kikkut tamarmik § 10, imm. 2-imi immikkut akuersissuteqartarnermi pineqartunut ilaassasut naatsorsuutigineqanngilaq. § 10, imm. 2-imi ilaatsinnginneq, ilinniartut ilinniartunut tapersissutinik tuneqqinneqarnissaannut immikkut tunngavilersuutissaqartillugu, pisuni immikkut ittuni atorveqassasoq, eqqarsaataavoq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa:”§ 12-imut nassuiaatini allassimavoq, takkuttartunut allattuiiffiit tunngavigalugit ilinniartunut tapersiissutini kommunalbestyrelsi annikillilerisinnaasoq. Kisiannili kommunalbestyrelsi tamatuminnga pisussaaffeqartoq aalajangersakkap oqaasertaanni allassimangilaq, tassalu annikillisitsinissamut periarfissaqaannarani.”

§ 12, imm. 2-imut (maannakkut § 13, imm. 2) nassuiaatit allangortinneqarput, taamaalilluni allassimalerluni kommuni annikillilerinissanut pisussaaffeqartoq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa:”§ 13, imm. 3-imut nassuiaatini allassimavoq, maleruagassat erseqqinnerusut ilitsersuutit aalajangersarneqarsinnaasut. Tassunga tunngatillugu oqaatigineqassaaq, ilitsersuutit maleruagassaannngitsut.”

Oqaaseqaat paasineqarpoq § 12, imm. 3-imut oqaaseqaataasoq, tassami § 13 tusarniaanerup nalaani imm. 3-eqanngimmat, aammalu tusarniaaffigineqartumit nassuiarneqartut § 12, imm. 3 ilitsersuutit pillugit nassuiaammik imaqarluni. § 12, imm. 3-ip (maannakkut § 13, imm. 3) oqaasertai allangortinneqarput, taamaalilluni ilitsersuutinut inatsimmi tunngaveqarnissaq pisariaqartoq allassimajunnaarluni.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup ingerlaqqilluni oqaatigaa:”§ 15-imut nassuiaatini aningaasartat sooq qaammammut kr. 500-inut aalajangersarneqarnerisut naatsumik nassuiarneqarpat iluaqutaassaaq.”

Ilinniartut aningaasaqarnikkut inissisimanerat eqqarsaatigalugu aningaasartat 500 koruuninut aalajangersarneqarput. Qaammammut 500 koruuninit annertunerusumik aningaasartaqarpata, ilinniartunut tapersiissutit annertussusaanut saniliullugu annertuallaalissasoq naliliisoqarpoq. Aammalu aningaasartat annertussusaasa assigaat Ilinniartunut tapersiisarneq pillugu Inatsisartut inatsisaanni aalajangersakkani § 28, imm. 1-imi aningaasartat annertussusaat aalajangerneqarsimasoq.

§ 15, imm. 2-imut (maannakkut § 16, imm. 2) nassuiaatit itisilerneqarput.

Kommune Kujalliup oqaatigaa: ” Nassuiaatini ”Majoriaq” inatsisissatut siunnersuummi ”suliffissanut, ilitersuisarnernut pikkorissaqqinnernullu qitiusumik ingerlatsivimmuut taaguutitut atorveqarpoq.”

Majoriaq taaguutaavoq aammalu suliffissanut, ilitersuisarnernut pikkorissaqqinnernullu qitiusumik ingerlatsiviit taamaaqatigalugu.

Suliffissanut, ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni taaguut suliffissanut, ilitersuisarnernut pikkorissaqqinnernullu qitiusumik ingerlatsiviit atorveqarpoq. Suliffissanut, ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni atuutereersumi oqaatsinut atorveqartunut naapertuunnissaa qulakkeerniarlugu, siunnersuummi taaguut suliffissanut, ilitersuisarnernut pikkorissaqqinnernullu qitiusumik ingerlatsiviit, atorveqarpoq.

Kommune Kujalliup oqaatigaa: ” Aallarniutigalugu ilinniagaqarnersiutinut nalunaarummut siunnersuut 2017-imi januaarimi tusarniaassutigineqartoq, aammalu 1. august 2017 atuutilersussatut naatsorsuutigineqartoq, aammalu ullup taassuma kingorna Majoriaq-mi ilinniartunut ilinniagaqarnersiutit/ilinniartunut tapersiissutit ilinniagaqarnersiutinut nalunaarummi pineqartunut ilaajunnaarsillugit aalajangersakkanik imaqarmat, tamanna naapertuutinngitsoq Kommune Kujalliup uparuassavaa. Ilinniartunut tapersiissutit pillugit inatsisissatut siunnersuut manna 1. januar 2018 atuutilissasoq siunnersuutigineqarpoq. Taamaalilluni naapertuutinngitsoqarpoq. Sunniutigisussaavaa innuttaasut Majoriaq-mi atuarlutik peqataanermi ilinniarnermut tapersiissutinik pisussat, 2017-imi august – december inatsimmi/maleruagassani tunngavissaaruttussaanerat. Kommune Kujalliup tulluanngitsoq taanna ilinniagaqarnersiutinut nalunaarummut siunnersuut pillugu tusarniaanermut akissuteqaammimi eqqaariigaa.”

Siunnersuutit tusarniaassutigineqareerneranili ilinniartunut tapersiissutinik maleruagassiineq ilinniartunut tapersiissutit pillugit Namminersorlutik Oqartussat nalunaarutaanni attatiinnerneqassasoq aalajangerneqarpoq, ilanngullugu ilinniartunut tapersiissutit pillugit

Namminersorlutik Oqartussat nalunaarutaanni nutaami ulloq 19. juuli 2017-imeersumi. Piffissami siunnersuutip matuma atuutilernissaa tikillugu ilinniartunut tapersiissutit taamaalillutik ilinniagaqarnersiutit pillugit Inatsisartut inatsisaanni aamma ilinniartunut tapersiissutit pillugit nalunaarummi atuuttumi maleruagassat maannamut atuuttut malillugit maleruagassiivigineqassapput.

Kommune Kujalliup oqaatigaa: " ... Naalackersuisut aalajangersakkanik sukumiinerusunik erseqqinnerusunik aalajangersaanissamut piginnaatinneqartut pillugu aalajangersakkanik inatsisissatut siunnersuut amerlasoorpassuarnik imaqarpoq. Piginnaatitsissutit taamaattut ajunngilluinnarput. Tassunga atatillugu kommune Kujalliup tikkuarusuppaa, "ilinniartunut tapersiissutit" pillugit aalajangersakkani tunngaviusunut il.il. tunngatillugu "ilinniagaqarnersiutininut maleruagassanut" atuuttut malinneqarnissaat pingaaruteqassasoq. Taamatut isumaqarnermut tunngavilersuutigineqarpoq, "ilinniartunut tapersiissutininut suliaasaqarfiup" aamma ilinniagaqarnersiutininut suliaasaqarfiup" akornanni assigiissaarinissap paasiuminartitsinissallu, innuttaasunut ersarinnerulersitseqataasussap, qulakkeerneqarnissaa."

Ilinniartunut tapersiissutit pillugit maleruagassat arlalitsigut ilinniagaqarnersiutininut suliaasaqarfimmi maleruagassanut eqqaanassasut ilimanarpoq. Aamma maleruagassat assigiinngissuteqarsinnaapput, assersuutigalugu ilinniartunut tapersiissutit suliffissarsiorturnut suliffeqalertussanut imaluunniit ilinniartitaanermi ingerlaqqittussanut imaluunniit taakkununga piareersartinneqartussanut, tunniunneqartussaanut pissutigalugu. Assersuutissaavoq ilinniartut akuerisaanngitsumik takkutinnngitsoonerannut tunngatillugu ilinniartunut tapersiissutit annikillilerneqartartussaanut. Annikillilerinissaq pillugu maleruagassat suliffeqarnermut suliaasaqarfimmi pisariaqarsorineqarput, tassami taakku ilinniartut pitsaasumik aalajangersimasumik ingerlalerinissaannut sakkussaasinnaammata, taamaalillutik taakku siunissami suliffeqalerlutik imaluunniit ilinniagaqalerlutik ingerlaqqinnissamut piareersimalersinnaallutik.

Kommune Kujalliup oqaatigaa: " Ilinniartunut tapersiissutit pillugit inatsisissatut siunnersuummi aamma ilinniartunut tapersiissutit qaqugukkut tunniunneqartassanersut, nassuiaatini allassimangilaq; "kingumoortumik" soorlu maannakkut periaaserineqartoq, imaluunniit "siumoortumik". Ilinniagaqarnersiutininut nalunaarutininut siunnersuut taaneqartoq, ilinniagaqarnersiutit 2017-imi aggustimiit siumoortumik tunniunneqartassasut (maannamut kingumoortumik pisartut paarlattuanik) pillugu aalajangersakkanik imaqarput. Ilinniagaqarnersiutit kingumoortumik tunniunneqartarnerannit siumoortumik tunniunneqartalernerannut allannngortitsinissamut tunngavilersuutaavoq "ilinniagaqarnersiutit kingumoortumik tunniunneqarpata, ilinniarluni aallartinnissaq ajornakusoorsinnaasoq taamaalillunilu kajumissuseerutsitsissalluni". Tunngavilersuutaasoq taamaaqataa ilinniartunut tapersiissutit tunniunneqartarnerat pillugu

tunngavilersuutigineqarsinnaavoq. Tassunga atatillugu pingaaruteqartoq tassaavoq tunngaviusut "ilinniartunut tapersiissutitut" aamma "ilinniagaqarnersiutitut" atuuttut assigiinnissaasa qulakkeernissaa."

Ilinniartunut tapersiissutit maannamut pisartutut kingumoortumik tunniunneqartassapput. Tamanna allanngortinneqassappat Naalakkersuisut suleriaaseq taanna nalunaarutitut ilusilimmi allanngortissinnaavaat.

Kingumoortumik tunniussissarneq suliffeqarfeqarfimmi akissarsisitsinermi pissutsinut eqqaanarpoq. Taamaatumik kingumoortumik tunniussissarneq naleqquttuusorineqarpoq ilinniartunut tapersiissutit tunniunneqartarnerat ilinniartut nalunaaquttap akunnerinut atuartitsiviusunut ataasiakkaanut takkuttarnerannut toqqaannartumik tunngaveqarmat.

Kommune Kujalliup siunnersuummi §§ 3-imut, 4-imut aamma 7-imut oqaatigaa: "Ilinniartunut tapersiissutit il.il. immikkoortuini ataasiakkaani aningaasartat annertussusissaannik aalajangersimasunik inatsisissatut siunnersuut imaqarpoq (§3). Annertussusiliussat iluarsineqartarnerat akinut kisitsisinut naleqqersuut aallaavigalugu ukiumoortumik iluarsisarnermut ataqatigiissinneqarpoq. Inatsisissatut siunnersuummut nassuiaatini iluarsisarnermut tunngaviusoq taanna akinut kisitsisit annertussusiliussani malinneqarnissaat tunngavilersuutigineqarpoq. Sunniutaassaaq, iluarsinerup siulliup kingorna annertussusiliussat equngasumik "aningaasartaqalereertussaannerat", tamannalu innuttaasunut taamatullu allaffissornermi ersarinnginnerulersitsissasoq paasiuminaannerulersitsissasorlu ilimanarpoq.

Kommune Kujalliup ukiumoortumik aningaasanut inatsisini annertussusissaliussat aalajangersarneqartarlutik maannakkut tunngaviusoq atornagu, akinut kisitsisit aallaavigalugit iluarsisarnermut ikaarsaarnissamut tunngavilersuutaasut erseqqinnerusut ujarporpai. Inatsisip oqaasertaanni ikiorsiissutit aalajangersimasut aalajangersarneqartarnerat, iluarsisarnernut allanngortitsisarnernullu tunngatillugu naleqqutinngilaq.

Kommune Kujalliup inassutigissavaa annertussusissaliussat ukiumoortumik aningaasanut inatsisini aalajangersarneqartarnerat ingerlaannassasoq, taamaalilluni aamma ilinniagaqarnersiutitut suliassaqarfimmut tunngaviusunut aamma ataqatigiissitsinissaq qulakkeerneqassalluni."

Aningaasartat annertussusaannut tunngatillugu innuttaasut siumoortumik paasereersimanissaat eqqarsaatigalugu annertussusissaliussat Inatsisartut inatsisaanni aalajangersarneqarput.

Siunnersuutip tusarniaassutigineqareernerata kingorna akinik iluarsiinissamut naleqqersuut naapertorlugu iluarsiinissaq pillugu aalajangersagaq peerneqarpoq. Tamatumunnga

pissutaavoq ilinniarnermut tapiissutitut annertussusissaliussat inatsimmi aalajangersarneqartut tarsiullugu ukiumoortumik iluarsineqartussaammata, procenti aaqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit, takuuk § 8. Annertussusissaliussat ukiumoortumik iluarsineqartarnerat, innuttaasunut ersarinnginnerulersitsinermik imaluunniit paasiuminaannerulersitsinermik malitseqartussaangilaq. Ukiumoortumik iluarsisarnissamut siunertaavoq ukiumiit ukiumut tunniunneqartartut piviusumik annikilliartuinnannginnissaannut illersuinissaq. Siunertaasoq taanna procenti aaqiissutissaq aamma maannakkorpiaq aningaasarsiat pillugit Inatsisartut inatsisaannut nassuiaammi nassuiarneqarpoq.

Kommune Kujalliup siunnersuummi § 3-imi immikkoortumut siullermut oqaatigaa: "Ilinniartut 18-it inorlugit ukiullit ilinniartut inaanniittut akeqanngitsumik nerisaqartinneqarlutillu ineqartinneqarput. Pisut assersuutigalugu akeqanngitsumik nerisaqartinneqarneq, nerisaqarnermut tapeq immikkoortortamut nerisaqartitsisumut akiliutitut nuunneqarsinnaassasoq, pillugu aalajangersagaq siunnersuummi amigaatigineqarpoq. Ilinniagaqarnersiutitut suliaasaqarfimmi taamaattoqarpoq, tassani assersuutigalugu GUX-imi atuartut 18-it inorlugit ukiullit ilinniartut inaanni nerisaqarfiusuni najugaqarunik, akeqanngitsumik nerisaqarlutik, aningaasartat nerisanut tapip annertoqqatai ilinniartut inaanni ingerlatsinermut missingersuutitut nuunneqartarlutik."

Siunnersuummi ilinniartunut tapersiissutinik tunniussisarneq maleruagassiivigineqarpoq. Tusarniaaffigineqartup oqaatigisaatut, pisuni aalajangersimasuni ilinniartunut tapersiissutit annikillilerneqarsinnaasut pillugu maleruagassanik siunnersuut imaqarpoq, assersuutigalugu ilinniartuq akeqanngitsumik nerisaqarpat aamma/imaluunniit ineqarpat.

Ilinniartuq 18-it inorlugit ukiulik, assersuutigalugu akeqanngitsumik nerisaqarpat ineqarpallu, kommunip ilinniartunut tapersiissutit siunnersuummi maleruagassat aamma annertussusissaliussat malillugit ilinniartumut tunniutissavai. Ilinniartut inaannik ingerlatsinerup maleruagassaliuunnissaa Inatsisartut inatsisaata matuma avataaniippoq.

Kommune Kujalliup siunnersuummi § 3-imi immikkoortut aappaannut oqaatigaa: "Siunnersuummi allassimavoq " akeqanngitsumik nerisaqartinneqartut ineqartinneqartullu, tamatumunnga aningaasanik ilanngaavigitittassapput". "Ineqarneq" pillugu aningaasartanik allassimasoqangilaq. Kommune Kujalliup naatsorsuutigaa ineqarnermut/ilinniartut inaannut akiliutitut ilinniagaqarnersiutitini maleruagassanut tunngatillugu qaammammut 850 koruunit maannakkut aningaasartaritinneqartut atorlugit aalajangersaasoqassasoq.

Ineqarnermut aningaasartuutit aallaaviatigut maannakkut annertussusissaliussatut, tusarniaaffigineqartumit taaneqartutut, aalajangersarneqassapput. Ineqarnermut aningaasartuutit ataasiakkaatigut naliliineq malillugu nikerarsinnaapput. Assersuutigalugu kommunip ineqarnermut aningaasartuutivii qaammammut 850 koruuninit annikinnerusimappata, ilinniartunut tapersiissutinit aningaasartat ineqarnermut aningaasartuutiviusutut annertussuseqartut kisimik ilanngaatigineqassapput.

Kommune Kujalliup ingerlaqqilluni oqaatigaa: "Akeqanngitsumik nerisaqarnermut aalajangersakkamut tunngatillugu siunnersuutip sunniutigisaanik, kommunit ilinniartunut suliffissanut, ilitsersuisarnernut pikkorissaqqinnernullu qitiusumik ingerlatsivinni atuartunut 18-it inorlugit ukiulinnut akeqanngitsumik inissaqartitsisarnissaq pillugu inatsimmi piunasaqaateqalissaaq. Pissutsit taamaattut ilinniartitaanermut suliassaqarfimmi ukiut arlallit matuma siornatigut atuutsinneqalerput, Majoriaq-mili ilinniartut inaannut kommunit ingerlanneqartunut sunniutaasussat paasinarsisinneqanngisaannarlutik. Kommune Kujalliup pisunut pissutsinullu taakkununnga paasinarsisitsilluni tunngavilersuuteqarnissaq utaqqivaa."

Aallaaviatigut tamanna pisariaqartinneqarpat aammalu kommune tamatumunnga periarfissaqarpat, kommunit ilinniartunut 18-it inorlugit ukiulinnut inissaqartitsisartussaapput. Ineqarnermut pissutsit pillugit apeqqutit maleruagassaliuutissallugit Inatsisartut inatsiaata matuma avataaniippoq. Ineqarnermut pissutsinut tunngatillugu Inatsisartut inatsisaanni maleruagassatuat tassaapput ilinniarnermut tapersiissutinit tunniunneqartartunit ilanngaassutaasinnaammat ilinniartoq ineqarnerminut akiliunneqartarpat aamma ilinniartunut 18-it inorlugit ukiulinnut ilinniarnermi tapersiissutit ineqarnermut tapiissutissanik imaqarsinnaammata.

Kommune Kujalliup siunnersuummi § 7-imut oqaatigaa: "Kommune Kujalliup inassutigissavaa, meeqqanut tapip annertussusissaa ilinniagaqarnersiutitut suliassaqarfimmi tunngaviusut assingi malillugit aalajangersarneqassasoq, tassalu "meeqqanut akilersuutitut nalinginnaasunut", inatsisinni allani nassuiarneqartunut, annertussusissaliussat aallaavigalugit. Taamaalilluni aamma ilinniartunut tapersiissutit/ilinniarnermut tapiissutit akileraaruteqaataasussaassat meeqqanut tapit akileraaruteqaataasusnaanatik, ilinniagaqarnersiutitut suliassaqarfimmi tunngaviusut assingisa atuutsinnissaat qulakkeerneqarsinnaavoq."

Meeqqanut tapit meeqqanut tapinut annertussusissaliussat nalinginnaasut malillugit aalajangersarneqarnissaat ilimagineqarpoq, soorlu meeqqanut tapit maannamut suliffissanut, ilitsersuisarnernut pikkorissaqqinnernullu qitiusumik ingerlatsivinni ilinniartunut aalajangersarneqartarnerattut. Taamaalilluni manna tikillugu ileqqusoq nanginneqasaaq Naalackersuisut allamk aalajangiinissaata tungaanut. Taamaalilluni aallavittut meeqqanut

tapit meeqqanut tapit nalinginnaasut pisortanit ikiorsiissutit pillugit Inatsisartut peqqussutaat naapertorlugu aalajangerneqarsimasut malissavaat. Pisortanit ikiorsiissutit pillugit Inatsisartut peqqussutaat naapertorlugu 2017-imut ikiorsiissutit annertussusaat 1. januaari 2017 naatsorsuutigalugu pisortanit ikiorsiissutit aningaasannorlugit tigusassat atuuttut pillugit kaajallaasitaq normu 284-imi takuneqarsinnaapput.

Kommune Kujalliap siunnersuummi § 5-imut oqaatigaa: ”Aalajangersakkami allassimavoq kommunit ataasiakkaat tamarmik ilinniartunut Naalackersuisunut kiffartuunneqarnissamut isumaqatigiissutit ukiumoortumik ilinniartut amerlassusissaannik imaqartut malillugit ilinniartunut tapersiissutinik pisartaqarsinnaasunut ilinniartut amerlassusissaat malillugu tunineqartassasut.... Suliffissanut, ilitsersuisarnernut pikkorissaqqinnernullu qitiusumik ingerlatsivik pillugu inatsimmi allassimalluni ”angusassanut isumaqatigiissut” ”kiffartuunneqarnissamut isumaqatigiissutit” atorneqarani; inatsisip oqaasertai imminnut tulluarsarneqartariaqarput.

Aamma takukkit siunnersuummut § 1 pillugu nassuiaatit, tassani immikkoortumi kingullermi allassimalluni ”ukiumut ilinniartut amerlassusissaat, kommuninut ataasiakkaanut tunniunneqartussat, aningaasanut inatsimmi Inatsisartunit aalajangersarneqassaaq”. Kommune Kujalliap nassuiaammi oqaasertaliineq eqqornerseq apeqquserpaa, takuuk inatsimmi § 5-ip imarisaa. Nassuiaatini allassimavoq ”kommuninut ataasiakkaanut” aningaasanut inatsit aqputigalugu aalajangersarneqassasooq, inatsisip oqaasertaannut siunnersuummi kiffartuunneqarnissamut isumaqatigiissummi aalajangersarneqassasooq allassimalluni, taannalu pissusiviusuni tassaagalarpoq ”angusassanut isumaqatigiissut”.

Siunnersuut aamma nassuiaatit iluarsineqarput, taamaalilluni kommunimi suliffissanut, ilitsersuisarnernut pikkorissaqqinnernullu qitiusumik ingerlatsiviit ingerlanneqarnerat pillugu Naalackersuisut aamma kommunit akornanni isumaqatigiissutit assigiimmik angusassanut isumaqatigiissutinik taaneqarlutik. Taaguut aamma suliffissanut, ilitsersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni, § 9, imm. 1-imi allassimavoq.

Kommune Kujalliap ingerlaqqilluni oqaatigaa: ”Kommune Kujalliap oqaatigaa, inuit allatut pisortanit tamakkiisumik pilersorneqartut, ilinniartunut tapersiissutinik tigusartagaqarsinnaanersut imaluunniit taamaassinnaanginnerseq pillugu aalajangersakkanik inatsisissatut siunnersuut imaqqangitsoq. Maannakkut ilinniagaqarnersiutinut/ilinniartunut tapersiissutinut maleruagassani allassimavoq, inuit pisortanit tamakkiisumik pilersorneqartut ilinniartunut tapersiissutinik tigusartaqarsinnaangitsut. Pisortanit tamakkiisumik pilersorneqarneq assersuutigalugu tassaasinnaavoq meeqqat inuusuttullu ulloq unnuarlu paaqqinniffimmi imaluunniit angajoqqaarsiani angerlarsimaffiup avataani inissinneqarsimasut, imaluunniit inuit

utoqqalinersiuteqartut imaluunniit siusinaartumik pensionisiaqartut. Kommune Kujalliu naatsorsuutigaa aalajangersakkat taamaattut inatsimmi ilanngunneqassasut.”

Maannamut pisartutut ilinniartunut tapersiissutit ilinniartup inuuniarnermut aningaasartuutaasa matussutissaattut siunertaqartumik inunnut allatut pisortanit ikiorserneqartartunit tigusartagarineqarsinnaangillat. Ilinniartut assersuutigalugu soraarnerussutisianik, suliffissaaleqinermi ikiorsiissutinik, ilinniagaqarnersiutinik imaluunniit pisortanit ikiorsiissutinik tigusartaqarnermut peqatigitillugu ilinniartunut tapersiissutinik tigusartagaqarsinnaangillat. Tamanna siunnersuutip § 2-ani erserpoq.

Kommune Kujalliu ingerlaqqilluni siunnersuummi § 2-imut nassuiaatinut oqaatigaa:” Ilaatigut allassimavoq ”suliffeqanngitsup suliffeqalernissamut imaluunniit ilinniagaqalernissamut ingerlaqqitsinnissaanut pikkorissaaqqinnissaq, pikkorissaaqqinnerni ataatsimoorutaavoq” (uagut erseqqissaanerput). Siunnerfigineqartut taamaalillunilu qinnuteqarsinnaatitaasut aamma Majoriaq-mi pikkorissaaqqinnissamut tiguneqarsinnaasut, suliffeqanngitsuinnarnut killeqanngillat. Majoriaq-mi atuartussat siunnerfigineqartut atitunerusumik annertunerusumillu aalajangerneqarput. Tamanna inatsisissatut siunnersuummut nassuiaatini allassimasariaqarpoq.”

Suliffissanut, ilitsersuisarnernut pikkorissaaqqinnernullu qitiusumik ingerlatsiviit suliassaat suliffissanut, ilitsersuisarnernut pikkorissaaqqinnernullu qitiusumik ingerlatsiviit pillugit Inatsisartut inatsisaat tunngavigalugu angusassanut isumaqatigiissutini nassuiarneqarput. Angusassanut isumaqatigiissutit atuarnernut siunnersuut malillugu ilinniartunut tapersiissutinik pisinnaatitaaffiusunut sanilliullugu suliassanik allanik imaqarsinnaapput.

Kommune Kujalliu ingerlaqqilluni siunnersuummi § 16-imut oqaatigaa:” Kommune Kujalliu aallarniutaasumiit oqaatigeqqissavaa, piffissami agusti - decembari 2017 ilinniartut ilinniartunut tapersiissutinik tigusaqartartut, inatsimmi tunngavissaqarunangimmata tulluanngitsoq.”

Siunnersuutip tusarniaassutigineqareerneraniilli aalajangerneqarpoq Namminersorlutik Oqartussat ilinniagaqarnersiutit pillugit nalunaarutaanni ilinniartunut tapersiissutit maleruagassiivigineqarnerat atuutsiinnarneqassasoq, ilanngullugu ilinniagaqarnersiutinut nalunaarummi nutaami. Siunnersuutip matuma atuutilernissaata tungaanut piffissami ilinniartunut tapersiissutit taamaalilluni ilinniagaqarnersiutit pillugit Inatsisartut inatsisaanni maleruagassat maannamut atuuttut aamma Namminersorlutik Oqartussat ilinniagaqarnersiutit pillugit nalunaarutaat atuuttoq malillugit maleruagassaqartinneqassaaq.

Qeqqata Kommuniata oqaatigaa:”Siullermik tusarniaanermut piffissarititaasup sivikippallaarnerata naammaginangilluinnarnera Qeqqata Kommunianit

oqaatigineqassaaq, tassa sumiiffinni Majoriaq-t kiisalu Kommunalbestyrelsip tusarniaassutigineqartunut peqataatinneqarnissaannut piffissarititaasoq sivikippallaarsimammat.”

Siunnersuut sapaatit akunnerini 5-ini tusarniaassutigineqarpoq.

Qeqqata Kommuniata oqaatigaa: ”Inatsisissatut siunnersuut Qeqqata Kommunianit pitsaasutut isigineqarpoq, tassa atuangitsoortarnermut/sulinngitsoortarnermut nalunaarsuisarnissaq pillugu malittarisassat ingerlateqqinneqarmata. Tamannali ilinniartunut 18-it inorlugit ukiulinnut nalunaarsuineq kinguneqartitsisinnaavoq, taakkumi nerisaqarnermut tapiiffigineqarnissamut pisinnaatitaapput. Tassunga atatillugu assigiissaartumik nalunaarsuinermit sakkoqarnissaq kissaatiginarpoq, maannakkummi nalunaarsuinerit nammineq naqiterinikkut ingerlanneqartarput, taamaalillunilu nalunaarsuinerit ingerlanerini arlalitsigut kukkuluttortoqarsinnaasarluni.”

Naalackersuisut 2017-ip aallartinnerani kommunit aamma suliffissanut, ilitsersuisarnernut pikkorissaqqinnernullu qitiusumik ingerlatsiviit (Majoriaq) qanoq kommuninut nalunaarusiortassanersut ilitsersuummik saqqummiipput. Ilitsersuummi siunertaavoq ilinniartunut tapersiissutinik utertillugit akiliisarnernut tunngatillugu suleriaatsinik assigiissaartitsinissaq. Ilitsersuut suliffissanut, ilitsersuisarnernut pikkorissaqqinnernullu qitiusumik ingerlatsiviit aamma kommunit ilinniartunut tapersiissutit sumut atorneqarsimanersut, ilanngullugu atuangitsoornerit qanoq annertutigisimanersut aammalu ilinniartunut tapersiissutit akuerisaangitsumik atuangitsoornerup malitsigisaanik qanoq annertutigisumik annikillilerneqarsimanersut qanoq nalunaarusiortassaneraat nassuiaatinik sukumiisunik imaqarpoq. Ilitsersuut aamma ilinniartunut 18-it inorlugit ukiulinnut nerisaqarnermut tapiissutinut aningaasartuutit nalunaarsorneqartarnerannut nalunaarusiorneqartarnerannullu nassuiaammik imaqarpoq.

Qeqqata Kommuniata oqaatigaa: ”Tamatumani saniatigut atuartunut atuagarsornerunngitsumik ingerlataqartunut nassuiaammik kommuni ujartuivoq, taakkumi FA-p ingerlanneqarneranut toqqaannartumik annertusisamik ingerlatitsisuupput, imaappa FA-mut toqqaannartumik qinnuteqartut 2 x 10 klip-imik pisartut, atuagarsornertaqannngitsumik ingerlatitsinerminni 1 x 10 klip-it pissarigaat, taamatullu FA-nerminni 1x 10 klip-it kisiisa pissallugit?”

Ilinniartut atuagarsorani pikkorissaqqinnermiittut tamanna tunngavigalugu atuagarsorluni pikkorissaqqinnermut kittaartakkamik annaasaqassanngillat, tassani ilaavoq FA-mi atuarneq. Ilinniartut assersuutigalugu qaammatini 10-ini atuagarsorani pikkorissaqqinnermut peqataasimasut, sulii qaammatini 2 x10-ini atuagarsorluni pikkorissaqqinnermut

peqataanissamut periarfissaqarput. Tamanna siunnersuummi §§ 10-mi aamma 11-mi aalajangersakkani marlunni allassimavoq.

KANUKOKA-p oqaatigaa: ” § 5-imi kiffartuunneqarnissamut isumaqatigiissutit pillugit aalajangersagaq ersarinngitsorujussuavoq. Kommune Kujallermit oqaaseqaatit aamma naapertorlugit, kiffartuunneqarnissamut isumaqatigiissummi taamaattumi suut erseqqinnersumik maleruagassiivigineqassanersut ersarinngilaq. ”

§ 5 (maanna § 4) aammalu tassunga nassuiaatit iluarsineqarput, taamaalilluni oqaaseq angusassanut isumaqatigiissutit atorneqalerluni. Nassuiaatit itisilernerqarput taamaalilluni allassimalerluni suliffissanut, ilitsersuisarnernut pikkorissaqqinnernullu qitiusumik ingerlatsiviit ingerlanneqarnerat pillugu kommunit aamma Naalackersuisut akornanni angusassanut isumaqatigiissutit nalinginnaasut, aamma suliffissanut, ilitsersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni § 9-imi inatsimmi tunngaveqartumik ilusilersorneqartut, tassani pineqartut.

Sulisitsisut oqaatigaa: ” Aallarniutigalugu suliffissanut, ilitsersuisarnernut pikkorissaqqinnernullu qitiusumik ingerlatsiviit Majoriaq-nut nutaanut taaguutitut atorneqarluni inatsisissatut siunnersuut Naalackersuisoqarfiup nassiummagu eqqumiippoq. Tamanna iluarsineqartariaqarpoq. ”

Suliffissanut, ilitsersuisarnernut pikkorissaqqinnernullu qitiusumik ingerlatsiviit pisortatigoortumik taaguutaavoq, suliffissanut, ilitsersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni atorneqartoq. Majoriaq taamaaqataanik isumaqarpoq aammalu taaguutaalluni. Suliffissanut, ilitsersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaannut naapertuunnissaa, taamaalillunilu inatsimmi taaguutinik atuinerup assigiissaarneqarnissaa qulakkeerniarlugu, siunnersuummi suliffissanut, ilitsersuisarnernut pikkorissaqqinnernullu qitiusumik ingerlatsiviit atorneqarpoq.

Sulisitsisut § 3-imit oqaatigaa: ” § 3, imm. 1, nr. 1-imi ilinniartunut ilinniartut inaanni nerisaqartuunngitsunut nerisaqarnermut tapiissutinut annertussusissaliussat aalajangersarneqarput, peqatigisaanik § 7, imm. 2-imi aalajangersarneqarpoq Naalackersuisut nerisaqarnermut tapiissutit pillugit maleruagassat erseqqinnerusut aalajangersassagaat. Inatsimmi aalajangersaasoqarmat Naalackersuisut nerisaqarnermut annertussusissaliussat allannngortissinnaanaviannngilaat. ”

§ 7, imm. 2-imi (maanna § 6, imm. 2) nerisaqarnermut tapiissutit § 3, nr. 1-imi (maanna § 7, nr. 1) allassimangippata, Naalackersuisut nerisaqarnermut tapiissutit pillugit

maleruagassanik erseqqinnerusunik aalajangersaasinnaanerannut inatsimmi tunngavissaliisoqarpoq. § 7, imm. 2-imut (maanna § 6, imm. 2) nassuiaatit itisilerneqarput.

§ 3, imm. 1, nr. 2-imi allassimavoq nerisaqarnermut ineqarnermullu aningaasanik ilanngaassisoqassasoq, kisianni allassimanngilaq aningaasat qanoq annertutigisut tassani pineqarnerisut. § 7, imm. 2 innersuussutigineqartariaqaraluarpoq.”

Oqaaseqaat § 3, nr. 2-imut (maanna § 7, nr. 2) oqaaseqaatit paasineqarpoq. § 3, (maanna § 7) nassuiaatini § 7, imm. 2-imut (maanna § 6, imm. 2) innersuussut ilanngunneqarpoq.

Sulisitsisut § 4-imut oqaatigaat:” § 4-imut uniffiup aappaani tunngaviusumik aningaasartat aamma soraarnerussutisianut tapeq taaneqarput. Allami allassimanngilaq tapersiissutitut tunngaviusumik aningaasartaqartoq aamma soraarnerussutisianut tapeqartoq. Ilinniartunut tapersiissutit saniatigut soraarnerussutisianut akiliisoqartarnera nalinginnaasuunnigilaq.”

§ 4 tusarniaanermeersoq siunnersuummi peerneqarpoq. Siunissami ilinniartunut tapersiissutitut annertussusissaliussat pillugit procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit ukiumoortumik iluarsineqartassapput, takuuk § 8.

IMAKip oqaatigaa:” IMAK isumaqanngilaq inatsisissatut siunnersuut saqqummiunneqassasoq. Maleruagassat taakkua arlaanniissapput, pikkorissaqqilluni pikkorissarnerluni, inuussuttunut ilinniartitaanermi imaluunniit ilinniartitaanerni allani atuarneq apeqqutaatinnagu. Ilinniartitaanermi sutigut tamatigut ataqatigiissitsisoqassaaq.”

Pikkorissaaqqinnerit suliffeqarnermut suliassaqarfiup ataaniipput.

SIK-p oqaatigaa:” SIKp oqaatigissavaa siunnersuummi § 3, imm. 2 naapertorlugu qaammammut ilinniagaqarnerisutit 4.400-inik annertussuseqartut akuersaarneqarsinnaanngitsut. Tunniunneqartussaq taamaalilluni ullutsinnut naleqqukkunnaarpoq aammalu ukiuni 11-ini qaffanneqarsimanani, aammalu siunnersuummi hundrede koruuninik ikittuinnarnik qaffattassasoq siunnerfigineqarpoq. Ineqarnermut aammalu nerisassarsiniarnermut il.il. aningaasartuutit akilerneqareerpata inuussutissat sinneruttunut aningaasat atorsinnaasat ikittuaraannangussapput. SIKp aamma SIK Inuusuttaasa taamaattumik piumasarissavaat ilinniartunut tapersiissutit malunnaatilimmik qaffallugit iluarsineqassasut.

Ilinniartunut tapersiissutit ukiumoortumik aningaasanut inatsisini pingaarnersiuiinerit tunngavigalugit aalajangersarneqarput. Aningaasartat ukiuni kingullerni allanngorsimanngillat. Siunnersuummi annertussusissaliussat ukiuni kingullerni atuussimasut

assingi atorneqarput. Siunissami ilinniartunut tapersiissutinut annertussusissaliussat tamanna pillugu procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit iluarsineqartassapput, takuuk § 8.

Tassunga atatillugu aamma inuusuttut isumaginninnermi ikiorserneqartartut aamma sulisartut ilinniagaqarsimasuunnigitsut il.il. ilinniarnissaminnik piumassuseqartut, ilinniagaqarneriutit taamatut appasitsigimmata, taamatut alloriarnissaq tunuarsimaarfisaraat eqqumaffigeqqussallugu pingaaruteqarpoq. Tamatuma saniatigut ilinniartut nammineq inigisaminni najugaqartut kommunimit aningaasaqarnikkut tapersiivigineqarsinnaanngillat, tamannalu ilaasa ilinniarnerminnik unitsitsinerannut pisooqataasarpoq.”

Ilinniartunut tapersiissutit qaffanneqassappata aningaasaqarneq pillugu inatsimmi tamatumunnga atugassanik immikkoortitsisoqassaaq.

SIK-p oqaatigaa: ” Siunnersuummi § 13 malillugu sullissivimmit akuerineqanngitsumik atuanngitsoorsimagaanni ilinniartunut tapersiissutini ilanngaatiginnittoqartussaavoq. SIK isumaqarpoq, ilinniartunut sullissivimmit akuersinissaq qanoq ulluinnarni pisassanersoq erseqqissumik nalunaarutigineqarnissaa, tassunga atatillugu pingaaruteqartoq, taamaalillutik ilinniartut napparsimanermi il.il. qanoq akuersissummik piniartassanersut ilisimassallugu. Taamaalilluni eqqortumik napparsimaneq il.il. pissutigalugit atuanngitsoornerup nalunaarutiginerani ilanngaasiisoqassasoq, aalajangersakkami isumaasimanaviannigilaq.”

Atuanngitsoornerit akuersaarneqarnissaat suliffissanut, ilitsersuisarnernut pikkorissaqqinnernullu qitiusumik ingerlatsivinni ataasiakkaani kommuninit aamma Naalackersuisunit ilitsersuiffigineqartumik aquneqartussaapput. Ilinniartut taamaalillutik atuanngitsoorneq pillugu apeqqutini pikkorissaqqinnerni sulisunut saaffiginnissinnaapput.

Siunnersuummi aalajangersakkanut ataasiakkaanut nassuiaat

§ 1-imut

Aalajangersakkami Inatsisartut inatsisaata atuuffissaa, tassaasoq ilinniartunut suliffissanut, ilitersuisarnernut pikkorissaqqinnernullu qitiusumik ingerlatsivimmi pikkorissaqqillutik ilinniartunut tapersiissutinik tunniussisarneq, aalajangersarneqarpoq.

Suliffissanut, ilitersuisarnernut pikkorissaqqinnernullu qitiusumik ingerlatsiviit paasineqassaaq tassaasut ingerlatsiviit, suliffissanut, ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaanni maleruagassiivigineqartut.

Suliffissanut, ilitersuisarnernut pikkorissaqqinnernullu qitiusumik ingerlatsivinni ingerlatat tamakkerlugit tapersiissuteqarfigineqarnissamut piukkunneqanngillat. Pikkorissaqqinnerit suut ilinniartunut tapersiissutinik tunniussiffigineqarnissamut periarfissaqartinneqarnersut, § 3-mi sammineqarpoq.

Ukiumut ilinniartut amerlassusissaat tamarmiusut maannamut aningaasanut inatsimmi aalajangersarneqartassasut naatsorsuutigineqarpoq.

Ukiumoortumik ilinniartut amerlassusissaasa amerlassusaat, kommuninut ataasiakkaanut tamaginnut tunniunneqartartut, kommuninut angusassanut isumaqatigiissutini Naalakkersuisunit aalajangersarneqassapput, takuuk § 4.

§ 2-mut

Ilinniagaqarnermut tapersiissutit pillugit Inatsisartut inatsisaanni atuuttumi § 2, imm. 3-mik ilaatigut ingerlatitseqqinneruvoq. Aalajangersakkap manna tikillugu eqqartuussisoqarnikkut inissisimaneq ingerlateqqippaa.

Aalajangersakkami siunertarineqarpoq tapiissutinik tunniussisoqartassanngitsoq ilinniartoq aamma pisortanit ikiorsiissutinik allanik inuuniarnermut aningaasartuutimi matunissaannut pisarpat, taakku ataanni soraarnerussutit, suliffeqarfeqarfimmit aningaasarsiat, ilinniagaqarnerisutit imaluunniit pisortanit ikiorsiissutit allallu.

§ 3-mut

Suliffissanut, ilitersuisarnernut pikkorissaqqinnernullu qitiusumik ingerlatsivinni pikkorissaqqinnerit suut ilinniartunut tapersiissutinik periarfissaqarfiunersut aalajangersakkami aalajangersarneqarpoq.

Pikkorissaaqqinnerit imarisassaat erseqqinnerusut, Namminersorlutik Oqartussat aamma akornanni angusassanut isumaqatigiissutit tunngavigalugit, aalajangersarneqassapput.

Ilinniartup suliffeqalernissamut imaluunniit ilinniagaqalernissamut ungasinnerusooq isigalugu ingerlaqitsinnissaanut pikkorissaaqqinnissaq, pikkorissaaqqinnerni ataatsimoorutaavoq. Pikkorissaaqqinnerit ilinniartup atuagarsorluni piginnaasaqarfiinik aammalu ilinniartup atuagarsorani piginnaasaqarfiinik, soorlu assersuutigalugu teknikkikkut pikkorissusaannik, annertusititsinissamut tunngasuusinnaapput.

Pikkorissaaqqinneq allatut iluseqartoq, nr. 5-imi taaneqartutut atuagarsornermut imaluunniit atuagarsornerunngitsumut tunngassuteqarsinnaavoq. Nr. 5-imi ”pikkorissaaqqinneq allatut iluseqartumut” assersuutaasinnaapput tunisassiornermut atuarfimmiinneq, Danmarkimi oqaatsinik pikkorissaneq, tammaarsimaarluni sulineq aamma pinngortitami pisunneq. ”Pikkorissaaqqinneq allatut iluseqartoq” suna ingerlatsiviit neqeroorutigineraat, suliffissanut, ilitsersuisarnernut pikkorissaaqqinnernullu qitiusumik ingerlatsiviit ingerlanneqarnerat pillugu ukiumoortumik angusassanut isumaqatigiissutit apeqqutaassapput.

§ 4-mut

Angusassanut isumaqatigiissutit suliffissanut, ilitsersuisarnernut pikkorissaaqqinnernullu qitiusumik ingerlatsiviit, tamannalu maannamut pisartutut suliffissanut, ilitsersuisarnernut pikkorissaaqqinnernullu qitiusumik ingerlatsiviit pillugit Inatsisartut inatsisaanni § 9-imi inatsimmi tunngavissalerneqarpoq.

Aalajangersagaq malillugu kommunini tamani ukiumut ilinniartut amerlassusissaat Naalakkersuisut kommunillu maannamut pisartutut angusassanut isumaqatigiissutaanni aalajangersarneqassaaq.

Ukiumut ilinniartut amerlassusissaat maannamut pisartutut aningaasaqarnermut inatsimmi aalajangersarneqassaaq. Taamaalilluni ilinniartut kommuninut ataasiakkaanut agguanneqarneri aningaasaqarnermut inatsimmi sinaakkusiunneqartup iluani pissapput.

§ 5-imut

Kommunalbestyrelsi ilinniartunut tapersiissutinik qinnuteqaatinik suliarinnittuussasoq aammalu maleruagassat atuuttut tunngavigalugit ilinniartunut tapersiissutinik tunniussinernut ataasiakkaanut ingerlatsisuussasoq pillugu tunngaviusooq aalajangersakkami aalajangersarneqarpoq.

Kommunalbestyrelsip suliassai, suliffissanut, ilitersuisarnernut pikkorissaqqinnernullu qitiusumik ingerlatsiviit pillugit inatsisartut inatsisaannut killissaliussat aamma killissaliussat suliffissanut, ilitersuisarnernut pikkorissaqqinnernullu qitiusumik ingerlatsiviit ingerlanneqarnerat pillugu Namminersorlutik Oqartussat aamma kommunit akornanni angusassanut isumaqatigiissutini aalajangersagaasut iluanni Suliffissanut, ilitersuisarnernut pikkorissaqqinnernullu qitiusumik ingerlatsivinni ingerlatsinermut akisussaasuunerannut, ataqatigiissillugit isigineqassapput.

§ 6-imut

Imm. 1-imut

Ilinniartunut tapersiissutit ilinniarnermut tapiissutit tunniunneqarsinnaapput, taakkualu aningaasartai § 7-imi aalajangersagaapput. Aalajangersakkami aalajangersarneqarpoq ilinniarnermut tapiissutit, qaammammut ikiorsiissutit saniatigut meeqqanut tapit aamma akiliunneqarluni angalanertut, tunniunneqarsinnaasut.

Imm. 2-imut

Meeqqanut tapip annertussusissaa aamma akiliunneqarluni angalanissamik periarfissaqarneq pillugit maleruagassat erseqqinnerusut, Naalackersuisunit aalajangersarneqassapput. Maleruagassat innuttaasunut sammitinneqarpata, maleruagassat nalunaarutit iluseqartumi aalajangersarneqassasut naatsorsuutigineqarpoq.

Assersuutigalugu ilinniartup meeqqani najortiginerai, ilinniartoq meeqqamut angajoqqaatut akisussaansoq ilaalu ilanngullugit qanoq sunniuteqartinneqarnissai pillugit Naalackersuisut erseqqinnerusunik aalajangersaasinnaapput. Meeqqanut tapeq pillugu maleruagassat maannamut atuuttut suli atuutissasut naatsorsuutigineqarpoq.

Akiliunneqarluni angalanissanut tunngatillugu assersuutigalugu Naalackersuisut aalajangersaasinnaapput pisut qanoq ittut akiliunneqarluni angalasinnaatitsisinnaanersut aamma akiliunneqarluni angalanissamik tunniussisarneq sunik piumasaqaateqassanersoq.

Naalackersuisut aamma nerisaqarneq ineqarnerlu qanoq nalilerneqassanersut aalajangiisinnapput. Taamaattoq inuusuttunut 18-it inorlugit ukiulinnut, ilinniartut inaanni nerisaqartinneqarnissamut periarfissaqanngitsunut imaluunniit ilaannakortumik taamaallaat periarfissaqartinneqartunut tapiissutit nalunaarutit ilusilimmi aalajangersarneqassanngillat. Tassani annertussusissaliussat siunnersuummi § 7, nr. 1-imi aalajangersarneqarput.

§ 7-imut

Aalajangersakkami ilinniarnermut tapiissutitut aammalu ilaannakortumik nerisaqarnermut annertussusissaliussat Inatsisartut inatsisaanni aalajangersarneqarput. Annertussusissaliussat aningaasanut inatsimmut taarsiullugu Inatsisartut inatsisaanni aalajangersarneqarnissaat naleqquttuutinneqarpoq, tassami tamanna tunniunneqartartunut tunngatillugu sioqqutsisumik ilisimaarinnilersitsissammat

Aningaasartat annertussusissaat maannakkut ilinniartunut tapiissutitut annertussusiliussanut, 2017-imut aningaasanut inatsimmi aalajangersagaasunut, naapertuuttumik annertussusilerlugit aalajangersarneqarput. Siunnersuummi taamaalilluni maannamut ilinniarnermut tapiissutitut annertussusiliussat annertussusaat attatiinnarneqarpoq.

Annertussusissaliussanut aaqqiissutissaq pillugu procenti aamma maannakkorpiaq aningaasarsiat pillugit Inatsisartut inatsisaanni maleruagassat malillugit ukiumoortumik iluarsineqartassapput, takuuk § 8.

Aningaasartassat annertussusissaat maannamut pisartutut ilinniartoq 18-it sinnerlugit imaluunniit inorlugit ukioqarnersoq apeqqutaatillugu nikerarput. Aningaasartat annertussusissaanni ineqarnermut nerisaqarnermullu aningaasartuutit sillimaffigineqarput.

Nerisaqartinneqarnerup ineqartinneqarnerullu qanoq naleqartinneqartarnissaat pillugit erseqqinnerusumik aalajangersaaviginissaannut Naalakkersuisut pisinnaatinneqarput, takuuk § 6, imm. 2.

§ 8-mut

Aalajangersakkami siunertaavoq ilinniarnermut procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat malillugu ukiumoortumik iluarsineqartarnissaasa qulakkeerneqarnissaat.

Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaata ikiorsiissutitut pisortanit tunniunneqartartuni nalinginnaasumik atorneqarnissaa siunertaavoq. Iluarsiiinermi pisortanit ikiorsiissutit pineqartunut ilaasut ingerlaavartumik akinut iluarsineqartarnissaat assigiissaarneqarnissaallu qulakkeerneqassaaq.

Iluarsiiinermi ilinniarnermut tapiissutit nalingata ukiut ingerlanerini, akini aammalu inuiaqatigiinni isertitani nalinginnaasumik qaffaataasut malitsigisaannik, neriorneqarnissaa pitsaaliorneqassaaq.

§ 9-mut

Aalajangersakkami ilinniartunut tapersiissutit taamaallaat ilinniartunut pikkorissaaqqinnermi ingerlatsisunut tunniunneqarsinnaasut pillugu tunngaviusoq malinneqarpoq.

§ 10-mut

Imm. 1-imut

Aalajangersakkami, ilinniartut pikkorissaaqqinnermi naleqqutinngitsumik sivisuumik inissisimanissaasa pinngitsoortinnissaat, siunertaavoq.

Atuagarsorluni pikkorissaaqqinnermut tunngatillugu qaammatini 10-ini marloriarluni ingerlataqarnissaq, misilittakkat tunngavigalugit piffissap pikkorissaaqqilluni atuarnerup sivilunerpaaffigisariaqagaatut naleqqunnerpaatinneqarpoq.

Imm. 2-imut

Pissutsit immikkut ittut assersuutigalugu tassaasinnaavoq suliffissaaleqisoq suliffissaaleqinnerminut atatillugu annerpaamik pikkorissaaqqinnermi siusinnerusukkut ingerlatsereersimasoq suliffeqarnermi imaluunniit ilinniartitaanermi ingerlaqqinnissaminut pikkorissaaqqinnermi iluaqutaasumik peqataasinnaasutut naliliivigineqartoq.

§ 11-mut

Imm. 1-imut

Aalajangersakkami siunertaavoq ilinniartut naleqqutinngitsumik sivisuumik pikkorissaaqqinnermi ingerlatsinissaasa pinngitsoortinnissaat.

Atuagarsorani pikkorissaaqqinnermut tunngatillugu misilittakkat tunngavigalugit piffissap pikkorissaaqqiffiusoq qaammatit 10-nit sivilunerusariaqanngitsoq naleqqunnerpaajutinneqarpoq.

Imm. 2-imut

Pissutsit immikkut ittut assersuutigalugu tassaasinnaapput suliffissaaleqisoq siusinnerusukkut suliffissaaleqinnerminut atatillugu pikkorissaaqqinnerit annerpaaffissaannik amerlassuseqartunik pikkorissaaqqissimasoq, suliffeqarnermut imaluunniit ilinniartitaanermi ingerlaqqinnissamut iluaqutaasumik pikkorissaaqqinnermi peqataaqqissinnaasutut naliliiffigineqartoq.

§ 12-imut

Maleruagassat assersuutigalugu meeqqanut tapinik, nerisaqarnermut tapiissutinik aamma akiliunneqarluni angalanernut erseqqinnerusumik maleruagassiinissamut tunngassuteqarsinnaapput. Maleruagassani innuttaasut pisussaaffilerneqassappata, maleruagassat nalunaarutitut aalajangersarneqassasut naatsorsuutigineqarpoq.

§ 13-imut

Imm. 1-imut

Takkuttartut allattuiffiisa qanoq iluseqarnissaat Naalackersuisunit aalajangersarneqassapput, takuuk imm. 3.

Imm. 2-imut

Takkuttartunut allattuiffiit kommunalbestyrelsimut tunniunneqassapput. Takkuttartunut allattuiffiit tunngavigalugit kommunalbestyrelsi ilinniartunut akuerisaanngitsumik atuangitsoortunut ilinniartunut tapersiissutini annikillisitsissaaq, takuuk § 14. Kommunalbestyrelsip tamatuma saniatigut takkuttartunut allattuiffiit Naalackersuisunut ilinniartunut tapersiissutininut aningaasartuutit utertinneqarnissaannik qinnuteqarnerminni, uppersaatitut atussavai, takuuk § 15.

Imm. 3-imut

Assersuutigalugu Naalackersuisut piumasaqarsinnaapput takkuttartunut allattuiffinni suut nalunaarsorneqartassanersut, qanoq akulikitsigisumik nalunaarusiortoqartassanersoq, aammalu pisussanut pilersaarutit suut periaatsillu suut nalunaarusiornermi atorneqassanersut. Assersuutigalugu piumasarineqarsinnaavoq takkuttartunut allattuiffiit holdit suuneri pillugit, peqataasut pillugit aamma ullormut takkuttarnerup qanoq akuttutigisarneri pillugit paasissutissanik imaqartassasut.

Naalackersuisut aamma atuangitsoornerit suut akuerisaasutut akuerisaanngitsutullu isigineqassanersut nalunaarummi erseqqinnerusumik maleruagassiissapput.

§ 14-imut

Imm. 1-imut

Maleruagassap oqaasertai maleruagassamut maannamut atuuttumut assingupput, taanna malillugu atuariartunngitsoornermi ilinniartunut tapersiissutit annikillisinneqartartussaallutik, takuuk ilinniagaqarnersiutit pillugit Namminersorlutik Oqartussat nalunaarutaanni § 29, imm. 6.

Ilinniartunut tapersiissutini annikillisitsisarnissamik pisussaaffiliinermi ilinniartunut pikkorissaqqinnermi eqeersimaartumik peqataanissamat kajumissuseqarnerulersitsinissaq qulakkeerneqassaaq.

Annikillisitsineq takkuttartunut allattuiffiit suliffissanut, ilitsersuisarnernut pikkorissaqqinnernullu qitiusumik ingerlatsivinnit suliarineqartut tunngavigalugit pisassaaq.

Suliffissanut, ilitsersuisarnernut pikkorissaqqinnernullu qitiusumik ingerlatsiviit ilinniartut atuangitsoornerat akuerisinnaavaat, assersuutigalugu ilinniartoq nakorsiarnissani pissutigalugu atuangitsoorpat.

Imm. 2-imut

Aalajangersakkami ilinniartunut tapersiissutini annikillisitsineq qanoq naatsorsorneqassanersoq aalajangersarneqarpoq. Aalajangersagaq ilinniagaqarnersiutit pillugit Namminersorlutik Oqartussat nalunaarutaanni § 29, imm. 7-imi maleruagassamat maannamut atuuttumut assinguvoq. Taanna naapertorlugu nalunaaquttap akunneranut annertussuseq naatsorsorneqassaaq ilinniartumut tapersiissut 173,3-mik agguarlugu.

Imm. 3-imut

Aalajangersakkami Naalakkersuisut annikinnerpaaffissanut killissamik aalajangersaanissamat periarfissinneqarput, taanna malillugu nalunaaquttap akunnerinik atuangitsoornerit ikinnerusut ilinniartunut tapersiissutini annikillilerinermik malitseqassanatik. Naalakkersuisut assersuutigalugu nalunaaquttap akunneri taakku nalunaaquttap akunneri aalajangersimasumik amerlassusilerlugit qaammammut aalajangersinnaavaat.

§ 15-imut

Imm. 1-imut

Ilinniartunut tapersiissutinut aningaasartuutinik utertitsinissamik qinnuteqaateqarnermi, kommunalbestyrelsip ilinniartut atuariartortarnerannut uppersaammik nassiussinissamat pisussaaffeqarnera Inatsisartut inatsisaanni aalajangersarneqarpoq.

2017-ip aallartinnerani ilinniartunut tapersiissutit tunniunneqarsimasut utertillugit akilerneqarnissaannik kommunit qanoq qinnuteqartassanersut pillugu Naalakkersuisut kommuninut aamma suliffissanut, ilitsersuisarnernut pikkorissaqqinnernullu qitiusumik ingerlatsivinnut nassiussippat, tassani ilaallutik paasisutissat suut kommunit utertillugit akiliinissaq pillugu qinnuteqaammut ilanngullugit Naalakkersuisunut nassiuttassaneraat.

Imm. 2-imut

Uppernarsaatit nalunaarutigineqassasut piumasaqaataavoq. Ilinniartunut tapersiissutinik utertitsilluni akiliinissaq pillugu qinnuteqaateqarnermut atatillugu uppernarsaasiisoqarsimanngippat Naalackersuisut utertitsilluni akiliinissaq itigartivissinnaavaa.

2017-ip aallartinnerani ilinniartunut tapersiissutit tunniunneqarsimasut utertillugit akilerneqarnissaannik kommunit qanoq qinnuteqartassanersut pillugu Naalackersuisut kommuninut aamma suliffissanut, ilitersuisarnernut pikkorissaqqinnernullu qitiusumik ingerlatsivinnut nassiussipput, tassani ilaallutik paasissutissat suut kommunit utertillugit akiliinissaq pillugu qinnuteqaammut ilanngullugit Naalackersuisunut nassiuttassaneraat.

Imm. 3-imut

Nalunaarusiorneq qanoq pisassanersoq Naalackersuisut piumasaqaateqarsinnaapput, ilanngullugu nalunaarusiorneq immersugassat immikkut ittut atorlugit imaluunniit IT-mi periaatsimik immikkut ittumik imaluunniit programminik atuilluni pisassanersoq. Naalackersuisut assersuutigalugu nalunaarusiornermi immersugassaq immikkut ittoq atorneqassasoq piumasaqaateqarsinnaapput, ilanngullugu paasissutissat immersugassami imaritinneqartussat suut pillugit piumasaqaat. Assersuutissaq alla tassaasinnaavoq paasissutissat IT-mi periaatsimi, soorlu assersuutigalugu IT-reg, nalunaarsorneqartassasut Naalackersuisut piumasaqaateqarsinnaassasut.

Aammattaaq § 13, imm. 3-imut nassuiaatit innersuussutigineqarput.

§ 16-imut

Imm. 1-imut

Ilinniagaqarnersiutit pillugit Inatsisartut inatsisaanni § 28, imm. 1 manna tikillugu atuuttoq aalajangersakkami ingerlateqqinneqarpoq.

Aalajangersakkami ilinniartunut tapersiissutit annertunaarlugit tunniunneqarsimasut, ilinniartunit ilinniartunut tapersiissutinik annertunaarlugit tunineqarsimasunit utertinnissaannik piumasaqarnissamut kommunit periarfissinneqarput. Aalajangersakkami erserpoq tunniussassanik ilanngaasinnaaneq taamaallaat ilinniartunut nalunngikkaluarlugu ilinniartunut tapersiissutinik pisinnaanatik pisarsimasunut atorneqarsinnaammat. Ilanngaasinnaanermut periarfissaq soorunami aatsaat pisinnaavoq ilanngagassaqarpat, taamaattumik ilanngaansaq taamaallaat ilinniartunut Namminersorlutik Oqartussat ilinniarnermut tapersiissutaanik pisartunut atuussinnaavoq.

Imm. 2-mut

Ilinniartut aningaasaqarnikkut inissisimanagerat eqqarsaatigalugu ilinniartunut tapersiissutinik annertunaarlugit tunniussinermi qaammammut qanoq annertutigisumik kommunalbestyrelsip ilanngaatigineqartussatut piumasaqaatigisinnaasaannut aningaasartat annerpaaffilerlugit aalajangersakkami aalajangersarneqarpoq.

§ 17-imut

Siunnersuutigineqarpoq Inatsisartut inatsisaat ulloq 1. januaari 2018 atuutilissasoq.